

定鄉小識卷二

錢塘張道少南

山水記二 五雲山路

五雲山上有天井東有長嶺西有五雲山嶺南面江爲姜釵嶺爲清風嶺又山西爲雲棲塢塢東爲壁觀峯下有青龍泉塢北爲迴耀峯峯東爲寶刀隴西南爲黃泥隴爲蕭家塢中峯下有聖義泉西岡下有金液泉塢西爲梅家塢有關嶺塢口爲雲棲塢溪出范村古爲范浦今爲范村浦西爲牛坊嶺

定鄉小識卷二

一

五雲山 咸淳臨安志五雲山在錢塘縣約高一百丈周回一十五里有真際院夢梁錄低處名五雲山萬厓杭州府志在縣治西南二十里高千丈周回十五里山半有伏虎亭梯以石礮以便往來至嶺平岡名月輪江三折當其前萬厓錢塘縣志天門山之支南行者曰五雲山高百丈俯瞰江江三折當其前雲棲紀事五雲山在府治西二十餘里先是山之巔有五色瑞雲盤旋其上因名西湖游覽志五雲山高數百丈周回十五里五峯森列駕軼雲霞盤曲而上凡七十二彎俯視南北兩峯若

雙錘朋立長江帶繞西湖鑑開檣帆往來若鷗鳧
出沒宋時每歲臘前得雪寺僧必捧雪表進城中
霰猶未集蓋其地特高寒云湖山便覽五雲山天
門山之支也五峯森列林壑蔚起陟江干盤紆而
上凡六里七十二彎石磴千有餘級頂有平岡長
江三折正當其面相傳舊有五色喬雲旋繞山頂
故以爲名宋故事每歲臘前城中霰猶未集山僧
必奉表以早雪進蓋其地特高寒也山腰有二亭
最上爲眞際院東北爲白沙塢西北爲雲棲塢西
湖志纂五雲山在府治西二十里

定鄉小識卷二

二

五雲山在徐村以五峯矗立高逼雲霄故名五
雲自蓮池創爲五色瑞雲盤繞山頂之說後人
從而和之其語荒渺出於附會且雲棲塢亦以
塢在五雲西古有棲眞院合呼雲棲耳乃云五
色雲飛集山西塢中因號雲棲塢亦叵信也山
高出羣峯俯視江上山如兒孫羅列山巔竹樹
蓊鬱森秀雲表與阿育王山相類山麓直跨范
村其徑由徐村三夫人廟西入山進五雲石碑
樓大路而上東達九溪西通雲棲宋薛梯颺元
錢曲江皆結廬於此山產蘭蕙最香又聶氏錢

唐縣志於五雲山下云其東北有白沙塢五雲去白沙塢三十餘里且在西北非東北也翟氏襲其文而承其譌殊不可解豈山東北別有一

白沙塢耶

田藝衡

字子藝錢塘人副使汝成子教授應天博學善屬文世比之成都楊慎

游五雲山記

乙卯秋八月二十四日余寓西井李鄴侯祠與徐子導鄉約爲五雲山之游適余赴酌吳子宗河家而徐子亦訪盛子汝誠遂寄宿法輪禪寺越日丁亥將乘輿獨往未及登輿會黃子惟岳吳子子明

定鄉小識卷二

三

來訪聞之躍然遂聯輿而出出湧金門而南過靈芝崇福律寺故址蓋近爲防盜所焚也折而西南由長橋過淨慈禪寺道經大慈月輪秦望諸山直登五雲山絕頂五雲山去城南二十里許高數百丈五峯並峙迴出雲霞週迴可十五里逶迤而上凡七十二彎其半分建二亭以接足力最上爲眞際院梁普覺禪師道場俯盼長江曲折東下沙渚迴伏間風帆煙艇若鷗泛鳧翔出沒無際定山浮山諸峯羣奔赴壑若渴蚪飲江而龕赭兩山對立海濤中逆之東南奇覽轉睫可盡院之前有天井

二覆之以亭舊稱大旱不枯僧言甲寅秋亢旱泉源亦竭取汲山下固甚艱也飯罷舉酒數酌其惜徐子之不與佳會甫出院百步而徐子肩輿追至相對撫掌興亦劇矣復入院投齋移時而返坐第一亭北眺西湖如露半鏡雙峯髻聳足下江湖之勝此其兼之復登月輪峯入開化寺振衣六和塔之第七級塔燬已久中存宋理宗真武像康伯可等策寫佛說四十章李伯時觀音像俱石刻無恙又入大慈山游定慧禪寺漱於虎跑泉味殊甘冽顧囊有佳茶惜日暮不暇煮嘗也少憩亭上誦蘇

定鄉小識卷二

四

子瞻詩及宋景濂銘未終篇爲僕夫催去過發祥祠游淨慈禪寺閱五百阿羅漢像閱廳爲五山之冠餘不及徧歷投宿於蔣公廟衆謂斯游也夜雨新霽秋氣正清盍登賦之朋極江山之賞雖日出而往日入而還所樂旣已多矣宜爲之記以續游史余於是乎書之

林景初

宋人

同金日新會宿五雲山

山氣清如沐林扉夜不扃月明苔徑白松暗水螢
青幽蕙臨風辨孤泉過石聽何當凌

康熙錢塘縣志作臨非

絕頂萬里極滄溟

戴表元

字帥初奉化州人咸淳中官建康教授轉國子主簿德祐之變避兵走鄰郡明年兵定歸里寓居於鄞授徒賣文以活

題五雲山圖

林廬深插紫屏顏一點漁舟帶暝還但得身閒無俯仰人間處處五雲山

方回

字萬里桐廬人宋隨州教授入元授建德路總管著讀易軒釋疑宋季襍傳諸書

題戚子雲五雲山圖

不濃不淡煙中樹如有如無雨外山尺素展看空想像何由身著畫圖間

定鄉小識卷二

五

錢惟善

字思復號曲江老人錢塘人著有江月松風集

登五雲山

普覺遺衣久不傳五雲山

萬厓康熙兩縣志均作故

色尙蒼然

斷厓蘿薜三千丈喬木風霜四百年龍井雨深泉

獨厚

兩縣志厚均作響

漁村潮上月初圓寶坊金碧紅塵

聚何似茲山更絕緣

馬臻

字志道號虛中大德中嗣天師張與材至燕京行內醮虛中與焉著有霞外集

五雲山寫望

少乏超絕姿瘦鶴存野格乾坤心自放頗覺塵土
安得千金橐使得窮地脈征途多荆榛此志甯

復得今晨躋山巔納納瞰南陌正東臨大江彷彿
海外國孤帆揚長風靜入秋氣白層巒引列嶂下
有雲霧隔不知誰家樓突兀立遠色禹穴指顧中
歷歷禾黍黑簸揚千古愁人世一過客高歌據苔
石坐見日車仄目極窮冥搜一雁沒空碧

呂希周

江口入五雲山

江上秋濤滾滾來羣山東赴海門開松陰百轉紆
黃蓋石磴千盤擁碧臺細草披雲穿徑出淺莎排
浪觸山迴仙壇尺五瞻天漢萬里銀河映斗台

定鄉小識卷二

六

許穀

登五雲山

名山高擁五雲層危磴重重躡屐登西望諸天應
咫尺東來疊嶂總邱陵海門遙指三山樹梵殿常
懸七寶燈便掃蒼苔題短句乾坤高覽記吾曾

沈明臣

字嘉則鄞人在胡少保宗憲幕府受知遇
獨深少保死請室明臣走哭墓下持所為
誄徧為訟寃世高其義

五雲山

偶凌吳岫恍蓬壺直駕長風上帝都石割鴻濛秋
色重路盤霄漢鳥飛無白雲東盡天連海青嶂西

來日滿湖信有胡麻堪飯客荷鋤於此作潛夫
許承祖

五雲山

石磴千盤倚碧天五雲輝映五峯顛遙看下界寒
光遍白玉花開紀瑞年

天井 在五雲山頂咸淳臨安志五雲山嶺上有天
井大旱不竭萬厯杭州府志五雲山有天井二大
旱不竭萬厯錢塘縣志五雲山巔有天井

田子藝游五雲山記云真際院之前有天井二
覆之以亭舊稱大旱不枯僧言甲寅秋亢旱泉

定鄉小識卷二

七

源亦竭取汲山下固甚艱也據是文則井亦有
時而涸矣

長嶺 在五雲山東萬厯杭州府志在五雲山東北
三里通九溪十八澗康熙錢塘縣志五雲山有長
嶺長二百丈高十五丈通九溪十八澗湖山便覽
東有長嶺通九溪十八澗

龍井郎當嶺下之關嶺西有山徑上五雲山疑
卽長嶺也

五雲山嶺 夢梁錄五雲山嶺在徐村及雲棲山俱

往來

姜釵嶺 在五雲山南萬麻杭州府志在縣西南二十里路登五雲山康熙錢塘縣志五雲山有姜釵嶺長一百二十丈高八丈登山者取徑焉

嶺卽徐村入山處徑也姜釵之名不可解當爲銅父之譌又徐村嶺一名江擦子嶺江擦與姜釵音亦相近豈卽是嶺耶

清風嶺 在范村江口上有斥埃烽墩下距江塘古嶺頭清芳亭故名今呼清風亭

雲棲塢 康熙錢塘縣志在五雲山西一里有雲棲寺釋祿引雲棲寺記五雲山有五色瑞雲已而五

定鄉小識卷二

八

雲飛集山西塢中經久不散時人異之號爲雲棲塢湖山便覽沿塢竹樹茂列幽蘭叢生如是者經七八里游人品爲湖山第一奧區李流芳有雲棲曉霧畫冊

李流芳 字長蘅嘉定人

無際游句餘將便道參雲棲走筆送之

六和塔前潮水渾西興渡頭山色昏歸來且莫翻天竺一路沿江到梵村

聞啟祥 字子將錢塘人著自娛齋集

雲棲晚歸原擬取道十八澗以多虎有戒心

不果

禪林歸路晚逐伴且兼程殘雪消猶在寒潮落更生望煙知郭近畏虎避山行忽忽孤清景還家意未平

王

微

字修微廣陵女子七歲失父流落北里所與游悉名士已而忽悟道歸禪悅徧游江楚築生塢於武林自號草衣道人卒於華亭性好名山撰名山記數百卷自序行世

長至入雲棲

晴日寒江路松雲入望深身香燃五分行樹拔千尋忍土如家舍交光映夙心還疑晏坐處猶發妙巖音

定鄉小識卷二

九

雲棲六景

湖山便覽青龍泉聖義泉金液泉三

泉與壁觀峯迴耀峯寶刀隴皆僧祿弘所名謂之雲棲六景

壁觀峯

雲棲紀事在雲棲塢東董其昌雲棲寺記

由東岡而上有壁觀峯

釋祿弘

字蓮池

壁觀峯

九年少室坐岑崑此地何人更效顰拂袖便歸千嶂外不來從爾問安心

張元抃

字陽和

壁觀峯

觀心甘康熙錢塘縣志廿作載坐蓮臺不覺蒲團
縣志作閉綠苔獨有孤峯常對面卻疑少室又
飛來

許承祖

壁觀峯

翠律孤峯翠作窩蓮臺縹緲俯雲蘿蒲團不覺苔
花秀面壁何人似達摩

青龍泉

雲棲紀事壁觀峯下有青龍泉出焉

釋祿弘

定鄉小識卷二

十

青龍泉

百竿青筧出流泉飛舞東西起復眠過客李氏西湖志作

玉乳今從不知來處遠祇疑香積有龍涎

迴耀峯

古名迴雁峯

康熙錢塘縣志在雲棲寺後高峻

插天

宋周博士詩云無端忽被閒雲引迴雁峯前掩
竹扉迴耀乃迴雁之譌也是詩後人誤以為余
知閣作然其名已古翟氏以六景皆云蓮池所

名非

釋祿弘

迴耀峯

東方初出漸當陽使得人間萬事忙轉軸西來山
欲暮寶元依舊映窗紗

沈澗字瀛洲

迴耀峯

遲遲日影漸西流倒入空巖紫氣浮莫向桑榆愁
景暮輝光長映碧山頭

許承祖

迴耀峯

林巒回合五雲飛息影曾傳掩竹扉滿目靈光何

定鄉小識卷二

十一

處是西來山色映斜暉

寶刀隴康熙錢塘縣志迴耀峯東岡爲寶刀隴

隴形如刀故名蓮池禪師塔院在焉

張元抃

寶刀隴

大冶千年鑄寶刀江干突兀立青霄不須暫試屠
龍技怪鱷狂螭孽自消

黃泥隴康熙錢塘縣志迴耀峯西南爲黃泥隴

蕭家塢康熙錢塘縣志迴耀峯西南爲蕭家塢雲

山勢窈窕草樹蒙茸真勝地也

聖義泉 雲棲紀事中峯之旁有泉名聖義

沈瀾

聖義泉

金液青龍夾道中分明別有一泉通涓涓不管流
年渡花自芳菲草自叢

宋守一 字化卿

聖義泉

卓錫甘泉噴雪飛青山薜荔客來稀可憐瑞靄盤
空谷幾度逢師浣衲衣

金液泉 雲棲紀事西岡之麓復出一泉名曰金液

定鄉小識卷二 三

董其昌雲棲寺記涓涓甘冽汲灌不竭

陳光贊 字方石

金液泉

寶池池底布黃金靈液涓涓出梵林山靜雲開明
月下寒光浮動見天心

梅家塢 在雲棲塢西北上郎當嶺達天竺越山而

東即老龍井東為羊棚塢踰塢可達大青嶺

關嶺 在梅家塢

雲棲塢溪 萬厓錢塘縣志溪水經朱橋入於江

雲棲溪水合梅家塢之水以洩於范村之感應

浦卽古范浦也聶氏以爲經朱橋非

范浦 在范村神州古史攷范村在府西南三十里
濱江唐時稱爲范浦崔國輔有宿范浦詩

范浦卽范村浦今呼感應浦者也又錢塘別有
一范浦咸淳志云錢鏐新築羅城自秦望山由
夾城東互江干泊錢塘湖霍山范浦周七十里
者也非此

崔國輔 字 吳郡人官集賢直學士

宿范浦

月暗潮又落西陵渡暫停村煙和海霧舟火亂江

定鄉小識卷二

三

星路轉定山遶塘連范浦橫鳴夷近何去空山臨
滄溟

范村浦 在范村西卽古范浦受雲棲塢梅家塢五
雲山西諸溪之水入浦從兩山間夾行而出以洩
於江上有橋曰感應故亦呼感應浦浦西岸爲牛
坊嶺

牛坊嶺 咸淳臨安志牛坊嶺在定山北鄉萬厓錢
塘縣志黃山之支東南行爲牛坊 一作嶺上有天
池 一作寺 康熙錢塘縣志牛坊嶺亦在定山北鄉
近江湖山便覽徐村嶺與礪馬嶺牛坊嶺俱在定

山北鄉

牛坊嶺在范村浦西午山之東孤島危厓俯懸
江表狂濤寒浪衝拍腳底征篷如葉出沒波間
東瞰海門南對浮嶼高覽遠眺頗聚江山之勝
嶺上有神宇及亭西麓爲天池寺攷夢梁錄南
宋有滌宮在六和塔之南嶺正滌牛所觀北山
路羊坊橋爲滌羊所義可見皆所以備望祭也
今俗以名不雅更呼爲留芳嶺亦作流芳嶺非

定鄉小識卷二

定鄉小識卷二